

## E PIKÁ INPORDONABEL

Na kuminsamentu nos mester konfesá ku pa hasi e esfuerso aki (pa splika e piká inpordonabel) kisas por ta muchu difísil pa e kapasidat humano. Un título apropiá pa e estudio aki por ta “Splikando e insplikabel”. Referiendo na e piká inpordonabel, Dr. Joseph Parker a bisa, “Probablemente no tin splikashon pa e misterio aki. E ta splika su mes mas mihó dor di stimulá un temor santu pa ku piká.”<sup>1</sup> Ta nos deseo ku den nos esfuerso pa “splika loke ta insplikabel,” un “temor santu pa ku piká” por wòrdu stimulá.

E tópiko nos dilanti ta dependé di kuater teksto:

*“Pesei Mi ta bisa boso, tur piká i blasfemia lo wòrdu pordoná na hende, ma blasfemia kontra e Spiritu lo no wòrdu pordoná. I ken ku papia un palabra kontra e Yu di hende, esei lo wòrdu pordoná na dje; ma ken ku papia kontra Spiritu Santu, esei lo no wòrdu pordoná na djé, ni den e siglo aki, ni den e siglo ku ta bini.”* (Mateo 12:31-32; mira tambe Marko 3:28-30; Lukas 12:10)

*“Si un hende mira su ruman kometé un piká ku no ta hiba na morto, e mester pidi Dios, i Dios, pa su motibu, lo duna bida na esnan ku a kometé piká ku no ta hiba na morto. Tin un piká ku ta hiba na morto; mi no ta bisa ku e mester pidi pa esaki. Tur inhustisia ta piká, i tin un piká ku no ta hiba na morto.”* (1 Juan 5:16-17)

Den nos estudio di e piká inpordonabel, nos lo no konsentrá riba 1 Juan 5:16-17. “Juan su (Skritura) ta ménos problematiko pasobra ta parse ku e ta papia di morto físiko i de todo kaso no por proba ku su spiertamentu ta referí na kondenashon eterno.”<sup>2</sup> Nos lo konsentrá riba Mateo su relato di Hesus su siñansa tokante e piká inpordonabel komo ku ta parse ku e relato aki ta mas completo.

Den e estudio aki nos lo mira diferente punto di bista tokante e piká inpordonabel. Anto nos lo purba klaria nos pensamentu tokante e piká úniko.

### A. UN RESUMEN DI ALGUN PUNTO DI BISTA PA KU E PIKÁ INPORDONABEL

Studentenan di Beibel ta interpretá e tekstonan ku ta trata ku e piká inpordonabel hopi diferente manera. Algun ta usa e tekstonan aki pa proba nan doktrinanan favorito. Por ehèmpel,

---

<sup>1</sup> J. Oswald Sanders, *The Holy Spirit of Promise*, (London: Marshall, Morgan & Scott, Ltd., 1940), p. 133.

<sup>2</sup> Robertson McQuilkin, *An Introduction to Biblical Ethics*, (Columbia:Columbia Bible College, 1985), p. 94.

algun ta insistí ku Mateo 12:32 ta proba e doktrina di purgatorio. Hesus a bisa kla kla ku blasfemia kontra Spiritu Santu no por wòrdu pordona “*ni den e siglo aki, ni den e siglo ku ta bin.*” For di esaki nan ta dedusí eroniamente ku algun piká por wòrdu pordoná despues di morto.

Nota algun otro perspektiva tokante e piká inpordonabel. Proposito di e resúmen aki no ta asina tantu pa desprobá e puntonan di bista. E resúmen ta inkluí mas parti pa duna un bista general di e diferente perspektiva. Despues, nos lo lo splika nos punto di bista.

1. E piká inpordonabel ta un di e pikánan mas grosero, manera asesinato òf divorso. Suisidio ta konsiderá un piká inpordonabel pasobra e persona no tin oportunitat mas pa pidi pordon pa su piká .

2. Algun hende ta surgerí ku e piká aki ta un pervershon di e sintido moral di hende. “Hesus no ta duna indikashon ku tin piká ku ta asina grandi ku no por trata kun’é via salbashon. Un hende ku intenshonalmente ta yama bon malu i (ta yama) malu bon ta un hende ku ta asina pèrvertí ku e lo no ke pordon; loke ta un prerekisito pa wòrdu pordona.”<sup>3</sup>

3. Pa bai atras spiritualmente ta e piká inpordonabel. Blasfemia kontra e Yu di Hende ta deskribí komo un piká promé ku konbertimentu, un piká hasí den ignoransia. Blasfemia kontra Spiritu ta spliká komo un echu konsiente di apostasia.

4. E piká inpordonabel ta un piká despues di resurekshon di Kristu. Mientras Hesus tabata riba mundu, e hudiunan a rechas’E den ignoransia; Su divinidat tabata skondí. P’esei, nan a haña un otro oportunitat. Ora nan a nenga di asept’E despues di Pentekostes, den pleno bista di e obra di Spiritu, nan destrukshon a wòrdu seyá.

5. Blasfemia kontra e Yu di Hende ta nifiká nada mas ku pa papia malu di un hende. Segun e komprendementu di e hudiunan, e título “Yu di hende” a nifiká un ser humano. Di otro banda, blasfemia kontra Spiritu Santu ta blasfemia kontra Dios mes.

6. E piká inpordonabel ta algu ku un hende ta bisa. Esnan ku ta mantené e punto di bista aki ta surgerí vários frase kondenabel. Algun ta haña ku pa akusá Hesus di ta poseé pa demonio ta e palabranan inpordonabel. “*Pasobra nan tabata bisa: ‘E tin un spiritu impuru’*” (Marko 3:30). Otronan ta bisa ku e piká ta pa bisa ku e obranan di Kristu òf di Spiritu Santu ta obranan di Satanas. Otro hende ta komprendé esaki komo kalumnia dirigí kontra Spiritu di Dios.

7. Un persona ta kometé e piká inpordonabel ora e ripitidamente ta nenga Spiritu Santu Su konvikshon te ora ku Spiritu Santu no ta konvensé e persona mas.

8. E piká inpordonabel a wòrdu hasi na un tempu spesífiko pa medio di un grupo di hende spesífiko, esta e hudiunan—e lídernan religioso di e hudiunan pa ser mas eksakto. Hesus a bin den poder di Spiritu Santu, presentando Su mes na Israel komo Esun ku tin derecho di ta nan Rei. Su milagernan a duna evidensia ku Su testimonio ta bèrdat. Tòg e interpretadornan eksperto di Skritura di e tempu ei, maske nan a rekonosé Su poder, nan a nenga di aseptá ku E ta Mesias, un echu mas kla ku di dia.

Klaramente e lista aki ta inkompleto. Nos lo pasa pa un otro punto di bista ku nos ta kere ta meresé un estudio mas profundo.

## **B. UN SPLIKASHON DI E PIKÁ INPORDONABEL**

Tin dos banda di e punto di bista aki ku nos tin ku nota: e parti eksterior i esun interior.

### **E Parti Eksterior di e Piká Inpordonabel**

Na promé bista ta visto ku e piká aki ta enserá blasfemia òf papiamentu kontra Spiritu Santu (Mateo 12:31). E piká di papia blasfemia kontra Dios en bèrdat ta un ofensa serio. Bou di Lei di Moises, blasfemia kontra Dios tabata kastigabel ku morto. “*..esun ku blasfemá e nòmber di SEÑOR mester wòrdu matá sigur...*” (Levítiko 24:16). Den e era di Tèstament Nobo, blasfemia kontra Spiritu a keda inpordonabel. E konteksto di e Skritura nos dilanti (Mateo 12) ta

---

<sup>3</sup> G.C. Howley, ed., *A New Testament Commentary*, (Grand Rapids: Zondervan Publishing House, 1969), p. 155.

indiká ku e lidernan hudiu religioso a bisa ku Satanas a hasi loke en berdat Spiritu Santu a hasi pa medio di Kristu. “*E hòmber aki ta saka demoño solamente pa medio di Beëlzebú, e prens di demoñonan*” (12:24). No ta riparabel di Hesus Su reakshon si El a haña ku nan a kometé e piká inpordonabel ku nan palabranan. Mínimo ku nos por bisa ta ku Su palabranan pa ku nan tabata un spiertamentu ku nan tabata na rant di hasi e piká tan serio.

Un pregunta ainda. Nos ta puntra nos mes pakiko ta tantu malu pa papia palabranan asina, ku pa hasi, por ehèmpel, adulterio òf asesinato? Pakiko un hende por wòrdu pordoná pa e pikánan grosero ei, pero nunca por haña pordon pa un frase di blasfemia? E pregunta aki ta obligá nos pa bai mas profundo den nos estudio.

### **E Parti Interior di e Piká Inpordonabel**

Señor ta hasié kla kla ku e problema no ta djis pa bisa algun frase òf palabra ku bo no mester bisa. Despues di a mensioná e realidat di e piká, El a duna e yabi ku ta laga nos kompéndé ku e palabranan di blasfemia tabata solamente un indikashon di un problema mas grandi. “*Of hasi e palu bon i su fruta bon, òf hasi e palu malu i su fruta malu, pasobra na su fruta bo ta konosé e palu.*” Segun 12:33, e fruta di e palu ta indiká kla ki tipo di palu e ta. Den e sintido spiritual, fruta ta un indikashon pafó di e bèrdadero kondishon spiritual paden. Loke un hende ta bisa i loke e ta hasi ta indiká kla kon e persona ta.

Vèrsikulonan 34 i 35 ta interpretá i klariá 12:33. “*...kon boso, siendo malu, por papia loke ta bon? Pasobra for di abundansia di kurason boka ta papia. E bon hende, for di su bon tesoro, ta saka loke ta bon; i e mal hende, for di su mal tesoro, ta saka loke ta malu.*” Boka ta lèk e kontenido di e rembak yen di kurason. Un bon hende ta papia bon pasobra su rembak ta yen di loke ta bon; i un mal hende (e implikashon ta e lidernan religioso hudiu) ta papia malu pasobra su rembak ta yen di maldat. “*... hende lo duna kuenta riba e dia di huisio pa kada palabra bano ku nan papia. Pasobra segun bo palabranan lo bo wòrdu hustifiká, i segun bo palabranan lo bo wòrdu kondená*” (12:36-37). E palabranan ku un persona ta papia ta di suma importansia. Òf nan ta konfirmá òf nan ta desprobá e persona su inosensia òf kulpabilidad. E teksto aki ta laga ningun duda ku e palabranan di blasfemia a brota for di un kurason korupto. Blasfemia kontra Spiritu Santu ta un piká teríbel. Ma e piká a bira inpordonabel pa motibu di e kondishon spiritual degenerá.

Kiko anto ta e piká inpordonabel? Nos lo pèmití algun estudiante renombrá di Beibel kontestá.

“Oposishon konstante i total kontra e influensia di Spiritu Santu, pa motibu di preferensia intensional di skuridat riba lus pa malu.” - Plummer

“Un aktitut persistente i kontinuo pa intensionalmente peka kontra e lus, apesar di tur Dios Su esfuersonan pa trese kambio.” - Thomas

“Un kombinashon di konosementu intelektual kla di e Evangelio ku un rechaso intensional di dje i un skohementu boluntario na fabor di piká; e union di lus den e kabes i odio den e kurason.” - Ryle<sup>4</sup>

“E ta un aktitut ku ta sera su sinti i konsenshi pa ku e konvikshon di Spiritu te ora ku e konsenshi ta bira asina duru ku e ún bos ku ta sklama na Dios, e bos di Spiritu, no por alkansá Dios mas.” - Myron Augsburg<sup>5</sup>

Nota vários karakteristika di e piká aki. 1) E ta un piká konsiente. Den kaso di e lídernan hudiu religioso, nan tabata e interpretadónan eksperto di Skritura e tempu ei. Segun nan teologia, algu sobrenatural ta bin di un di dos fuente: òf e ta bin di Dios òf di Satanas. Hesus Su

---

<sup>4</sup> Sanders, *Spirit of Promise*, p. 135.

<sup>5</sup> Lloyd J. Ogilvie, gen. ed., *The Communicator's Commentary*, 12 vols. (Waco, Texas: Word Books Publisher, 1982), vol. 1: *Matthew*, by Myron S. Augsburg, p. 159.

milagronan a duna testimonio kla di e echu ku fuente di Su poder ta divino. Ma nan a nenga asept'E pa ken E ta. Nan proklamashon ku El a hasi Su milagernan pa medio di poder di Satanas no tabata un akusashon ignorante. Nan a hasi e akusashon aki simplemente pa nan por evitá di kere den dj'E. 2) E ta un piká boluntario i intenshonal. E ta rebelion flagrante i plania kontra Dios Su boluntat revelá; e no ta un piká hasi sin pensa. 3) E ta un piká persistente i kontinu. E no ta un solo akto. E ta un aktitut fiho di oposishon kontra Dios. E piká inpordonabel ta karakterisá pa tur tres punto.

“Meskos ku e karbonnan sendé i e huma pretu ku volkan ta manda laira ta loke a wòrdu kolektá pa lunanan i añanan, asina e piká kontra Spiritu Santu no ta un palabra purá sin pensa, bisa den un momentu di rabia, ma e ta mas bien un proklamashon di e kondishon di e kurason i mente despues di simannan i lunanan di oposishon kontra e evangelio.”<sup>6</sup>

### C. ALGUN PREGUNTA TOKANTE E PIKÁ INPORDONABEL

Algun pregunta por lamta tokante e detayenan di e intepretashon aki. Nos tin ku konsiderá e preguntanan aki awor.

1. Pakiko un distinshon ta wòrdu hasi entre blasfemia kontra e Yu di Hende i blasfemia kontra e Spiritu Santu den Mateo 12?

Manera nos a nota kaba, algun hende ta bisa ku e título Yu di Hende ta referí na un ser humano, i asina ta hasi e distinshon entre blasfemia kontra Dios i blasfemia kontra hende. Nan ta bisa ku esaki ta splika dikun ta mas pekaminoso pa blasfemá Spiritu Santu en kontraste di blasfemá e Yu di Hende.

Un repaso di e Skrituranan ku ta hasi uso di e nòmber Yu di Hende ta konvensé nos mes ora ku e título aki ta usá di Hesus. Yu di Hende ta referí na e banda humano di e Dios-hende. Hopi hende no a rekonosé Hesus komo Dios pasobra su divinidat tabata kubrí ku e pañanan di humanidat. Pa e motibu ei, blasfemia kontra Hesus, e Yu di Hende, no ta asina serio ku blasfemia kontra e Spiritu Santu di Dios, Esun ku ta klaramente konosí komo divino.

Kisas tin indikashon aki pa ku e revelashonnan di Dios promé ku krus i despues di resurekshon. Promé ku e krus, Dios tabata lorá den karni humano. Despues di Pentekostes, e énfasis ta riba Spiritu Santu Su obra.

“Piká kontra e Yu di Hende por wòrdu pordoná pasobra, pa medio di Su nasementu umilde, mayornan umilde, èts. lo tabata fásil pa duda Su proklamashon di divinidat. Ma ora Spiritu Santu a bin, despues di Pentekostes, i a presentá na konsenshi di kada hende sufisiente evidencia pa proba e bèrdad di Hesus Su proklamashonnan, esun ku e ora ei a nenga di someté na Kristu Su deklarashon lo ta kulpabel di resistí, insultá, i pues blasfemá e testimonio di henter e Trinidad, di kua Spiritu ta e atministradó.”<sup>7</sup>

Nos no tin problema pa aseptá tur dos punto di bista, es ta ku e tabata tantu un piká promé ku krus komo un piká despues di resurekshon, espesialmente pasobra Hesus no a bisa ku nan ya kaba a kometé e piká inpordonabel ora E tabata papia ku e lidernan religioso hudiu.

2. Pakiko un persona ku ta kometé e piká inpordonabel no por ta pordoná?

Tin dos banda ku mester trata kuné pa kontestá e pregunta aki.

a. E banda humano.

Dios ta ofresé pa pordoná kada piká, inkluiendo e piká di blasfemia kontra Su Yu. Ma blasfemia kontra Spiritu Santu ta un otro tipo di piká. Esaki ta un piká ku ta nenga di ta pordoná.

---

<sup>6</sup> Augustus Hopkins Strong, *Systematic Theology*, (Valley Forge, PA: The Judson Press, 1907), p. 651.

<sup>7</sup> William Evans, *The Great Doctrines of the Bible*, (Chicago: Moody Press, 1912; revised ed., Chicago: Moody Press, 1974), p. 120-121.

“Mester tin dos hende pa por tin pordon—esun ku ta pordoná, i esun ku tin mester di pordon. Si esun ku a hasi piká ta nenga redondamente di wòrdu pordoná, kiko mas Dios por hasi? Pa Su Spiritu sigui lucha (ku e persona) lo solamente oumentá e pekador su responsabilidadat, i esei sin resultado. E piká ta inpordonabel pasobra e ta rechasá pordon...”<sup>8</sup>

Un hende ku ta nenga di wòrdu pordoná, no por ta pordoná. No ta ku Dios no por pordoná e piká aki òf ku Kristu Su sakrifisio no ta adekuá. E ta mustra e estado sumamente malu di esun ku ta hasi piká asina.

b. E banda divino

Un persona ku ta blasfemá Spiritu Santu ta pone Spiritu den un situashon impusíbel pa trese e persona na repintimentu.

“E tarea partikular di Spiritu ta pa trese konvikshon i repintimentu i pa hasi hende reseptivo na e invitashon di Kristu. P’esei kurasonnan ku ta odia Dios i ta blasfemá Dios (1 Timoteo 1:13) ainda por wòrdu konvensé i tresé na repintimentu pa medio di Spiritu. Ma esun ku ta rechasá kada esfuerso di Spiritu, ta alehá di e úniko forsa ku por gui’è na pordon (Juan 3:36).”<sup>9</sup>

Nos a hasi un esfuerso pa hasi loke ta impusibel—splika loke ta “insplikabel”. Nos a nota vários punto di bista di parti di esnan ku a purba splika e insplikabel i a purba presentá un splikashon ku ta satesfasé e outor. Nos ta spera ku e esfuerso aki por stimula “un temor santu pa piká.”

---

<sup>8</sup> Sanders, *Spirit of Promise*, p. 136.

<sup>9</sup>Charles F. Pfeiffer and Everett F. Harrison, *The New Testament and Wycliffe Bible Commentary*, (Chicago: Moody Press, 1962), p. 42.